

籌
遼
碩
畫



卷之四

籌遼碩畫卷之十七

己未季春

天都程開祐仲秩父輯

○山東巡按陳王庭題爲援將違律喪師狡奴猖獗愈甚乞亟勅廷議以救危疆併候

聖明處分事切照大兵誓師日期及分路出勦信地已經會題訖隨該經畧傳令四路酌量遠邇依期相繼而進續報總兵劉綎於二月二十五日寅時出寬奠小佃子口馬林二十八日巳時出鐵嶺三岔河杜松等二十九日申

時出撫順關口李如栢三月初一日巳時出
清河鴉鵲關口各去訖隨於初一日據分巡
道副使張銓差夜不收艾承恩押同撥夜古
雲鳳報說本日辰時有杜總兵出境離五嶺
二十里相遇夷撥活捉四名等語本日又據
二次撥夜高友才口報本日三更時杜總兵
至五嶺關達賊近戰已被杜總兵砍退得勝
斬獲首級不知其數等語初二日巳時據車
營原任叅將龔念遂原任留守李希泌稟稱

車營跟隨杜總兵等初一日前至邊外渾河約五十里水勢深急過渡兵馬衝去太多車兵入水空手尤難車輛火藥盡不能渡望見隔河南山一帶有虜騎行走忽有保定車營撥夜報稱山上達賊約有百餘騎衝下大路殺傷撥夜一十六名餘剩六名前撥已斷仍望見虜賊一枝徑過河北由後山遶去又據劉遊擊撥報相同職等恐斷歸路卽時安營天已近晚謹飭夜防以待天曉又有武靖家

丁沙有功身帶重傷入營說稱親見兵馬半渡達賊萬餘將杜總兵管剗斷將杜總兵圍住砍傷尾後損折不知數目見圍在山勢似危急等情到臣隨行分巡道速查以憑具題去後續於初四日卯時據分巡道副使張銓呈照得本道奉文監督潘撫一路官兵二萬五千餘員名預蒙經畧擬定師期日時前進又蒙按院監查嚴飭自本年二月二十八日杜總兵同王趙二總兵等師行初三日寅時

據鐵嶺撥夜口報馬總兵與開原潘僉事被
達虜不知其數圍住等語臣隨曾經畧督分
清河李鎮守兵一枝出援本路去後初四日
又據開原安樂州知州張文炳稟稱初三日
寅時據潘僉事家人樊天朝執印到卑職說
稱潘僉事在營兵馬被達賊勢衆趕散潘僉
事今無踪跡卽馬總兵麻副將趕散丁副將
鄭遊擊等多將亦不見一人影嚮爲此馳稟
以開原三面鄰虜東邊見是如此景象西邊

又報宰爖生心兩城空虛之極軍民惶惶心
大不定作何救寧潘僉事家人已將印封貯
在庫但料理兵馬等項以圖大振必急借重
一人庶人心有所恃賴而封疆亦甚幸矣又
臣差夜不收蔣興前去查探據本役回稱潘
僉事督兵隨營背中一箭致傷落馬無存岫
巖通判董爾礪亦隨陣致傷無存慶雲遊擊
竇永澄亦歿陣中協遊擊等官麻巖丁碧鄭
國良左輔王捷及馬總兵尚有馬兵萬餘潰

奔張家樓等情到臣復差遊擊馬燠查覈去
訖又據分守道閻鳴泰稟報李如栢官兵亦
與賊相持又據總兵劉綎二十八日兵丁次
深河子路口達賊截路獲級二顆生擒一名
達賊甚多擁奔山菁恐爲計誘不敢窮追等
情各到臣據此除損折官兵候查明另行具
題照得行師必以紀律方保萬全自誓師之
後經畧卽諭杜松等各以持重又約三月初
一日出口按期前進仍聽三路砲嚮併力齊

攻蓋其慎也乃本將慮恐功不出已于二十九日半夜出關哨見渾河南岸走有遊騎亟將兵先期競進其失一也此時三路兵馬未齊渾河水勢洶湧人馬渡河被水擁數十餘騎分巡道止之不聽趙夢麟諫之不聽車營將官懇止之而逢怒懷衆自用其失二也且不按隊爲營臨期每隊挑選數人以致隊伍錯亂爲賊所擊其失三也臨陣生擒活夷數人尅平一寨不加停哨撲躄而前致賺賊伏

內被誘不知其失四也將兵不習背水而戰其失五也輕騎深入撇棄火器車兵師無老營其失六也此六者胥兵家所忌也雖其爲人夙負忠勇志欲縛擒奴酋獻之

闕廷而智不能料敵謀不能馭衆致二萬餘官軍一時并遭陷潰卽敗散者過半恐畏罪逃匿召集難齊至于開鐵兵馬經畧初派由三岔出口援將馬林苦執由靖安出邊迨至臨期復連稟仍由三岔出口經畧准令與杜松

聯絡馬營乃撫順交鋒之時而該鎮迄未至也。比奴衆乘勝北驅該鎮隄防當無不至何守備不設致虜衆乘夜襲營兵亦敗潰令道廳不保而宣大兵馬生死相間存者亦復潰散矣。以上將官除杜松王宣等已經報亡餘俱存亡未的據除另查確姓名核實外再照經畧楊鎬既有督兵之責難辭失師之愆但將不聽令難歸咎本臣况搗賊之役與封疆失事自分且行間之拮据多勞末路之圖復

可望夷氛正熾倚藉更切伏望

聖明酌量議處以需後効者也臣王庭監察無方
損失有跡謹席藁待罪唯聽

聖明處分而已道臣張銓雖有監督之委原無封
疆之責似應寬議以分差等者也臣且聞叛
奴已幾十萬兼負山阻險我兵雖有數萬然
烏合之衆未經訓閱委難輕敵伏乞

勅下廷議早補大將道臣添兵益餉務殄叛奴以
雪國憤先將續調川陝兵連寬奠清河二路

主客兵馬寄劉綎官秉忠李如栢賀世賢等
分扎遼瀋開鐵諸邊亟爲訓練令遼民趁時
耕種并復築撫順清河城寨以駐芻糧將兵
調習士馬倍強撻伐自易臣無任悚息待
命之至

○貴州等道御史董元儒等題爲遼左危在呼吸
京師勢切剝膚懇乞

皇上親御便殿面諭廷臣亟圖安攘長策以救危
遼以固根本事頃自奴酋發難內厓

宸慮徵天下之兵竭海內之財特起經畧于田間
而畀之節鉞寵之尚方更不難渙發帑金以
大示鼓舞游頒

明旨以嚴用責成

皇上之加意遼事不爲不殷

皇上之委任經畧不爲不專且經畧受事迄今十
閱月于茲謀之不爲不久籌之不爲不熟中
外懸懸所望減此朝食以仰紓宵旰大奏

威靈者又何啻大旱之于雲霓饑渴之于飲食

詎意楊鎬輕率寡謀喪師辱國至于一敗塗地不可收拾有如羽書傳報者瀋陽一路全軍覆沒三總兵殲焉開鐵一路馬林僅留敗卒萬餘一道臣一通判殉之惟劉綎稍有斬獲而李如栢之僥倖無失第未與奴賊交鋒對壘耳目今大師喪敗之後我勢亦單奴氛益熾數日以來尚未知被中作何景象脫有不戒遼陽全鎮斷非吾有遼陽去而京畿重地立見震擺此誠國家危急存亡之秋也職

等相顧錯愕寢處俱廢皇皇然無復之人情
急則呼天此時不控之

皇上誰控也竊謂及今欲急圖外計莫若

皇上首下罪已之

詔宣告中外仍立罷摧稅以昭示大信則四方未
動之人心可以漸固特遣才望重臣并簡提
督大帥令其單騎星赴遼陽與經畧撫按審
度情形商確進止以徐收焦頭爛額之功則
全遼危疑之群情可以驟慰又速發帑金數